

Mensahe 7

Ang Tiunayng Diosnong Pinadayag kalabot sa Lihok sa Dios uban sa ug diha sa Mga Tawo sa Daang Tugon ug kalabot sa Lihok sa Dios sulod sa Tawo sa Bag-ong Tugon aron Matuman ang Gitinguha sa Kasingkasing sa Dios ug Matagbo ang Panginahanglan sa Tawo atubangan sa Dios

Basahong Kasulatan: Job 10:13; 42:1-6; Efe. 3:9; Juan 1:1, 14; Mat. 1:23; 2 Cor. 3:18; 4:16-17; Rom. 8:29-30; Col. 1:12, 15-19; 3:4, 10-11; Buh. 26:16-18; Efe. 3:16-19

- I. Naa sa Daang Tugon ang lihok sa Dios uban sa mga tawo ug diha sa mga tawo; ang lihok sa Dios uban sa mga tawo ug diha sa mga tawo dili direktang lihok nga magtuman sa walay kataposang pamatigayon Niya alang ni Cristo ug sa iglesia kondili ang dili direktang lihok diha sa daang kabuhatan Niya aron mag-andam sa direktang lihok Niya diha sa Iyang bag-ong kabuhatan alang sa walay kataposang pamatigayon Niya—2 Cor. 5:17; Gal. 6:15:**
 - A. Isip tawong gilalang sa Dios sa Iyang dagway, himoon gyod sa tawo ang Dios (nga gitiman-an sa kahoy sa kinabuhi) nga iyang kinabuhi aron makakinabuhi, makapadayag, ug makarepresentar siya sa Dios; ug kay ingon niana man, kinahanglan siyang matransporma aron mahimong hamiling materyales ug matukod nga kapikas alang sa Dios—Gen. 1:26-27; 2:9-12, 18-24.
 - B. Isip hulog nga tawo, dawaton gyod niya si Cristo aron matubos siya (nga gihulagwayan sa halad-inihaw ug sa dugo niini nga giula) aron mamatarong siya sa Dios diha ni Cristo (nga gihulagwayan sa mga kupo nga hinimo sa mga panit sa halad-inihaw); dawaton sab gyod sa hulog nga tawo si Cristo nga kaliwat sa babaye aron mahigawas siya sa gahom-sa-kamatayon ni Satanas nga “bitin”—3:8-9, 15, 21; Heb. 2:14.
 - C. Gitagad sa Dios ang tawo ug gikahimut-an Niya kini diha sa halad nga sinunog; ingon nga realidad sa halad nga sinuong, nagkinabuhi si Cristo nga bug-os gyong alang sa Dios ug sa katagbawan sa Dios ingog kahumot nga makatagbaw sa Dios aron malipay ug mahimuot Siya—Gen. 4:4; 8:20-22; Lev. 1:9; Isa. 42:1; Mat. 3:17; 17:5; 12:18; Juan 5:30; 6:38; 7:18; 8:29; 14:24; itandi sa 2 Cor. 2:15; A. S. 4:10-16.
 - D. Nisaad ang Dios kang Abraham nga diha sa iyang kaliwat (ni Cristo) mapanahanglangin ang tanang nasod sa yuta—Gen. 22:18; Gal. 3:8, 14, 16-17.
 - E. Isip tawong gipili sa Dios, modawat ug motubag gyod ang tawo sa pagtawag sa Dios (Gen. 12:1-4), magkinabuhi atubangan sa Dios pinaagi ni Cristo nga iyang halad nga sinunog (v. 7; 13:18; 22:13), ibutyag sa kasugoan aron makaila siya nga masal-anon siya ug dili gyod makatuman sa kasugoan (Exo. 19:8, 21—20:21), ug magkinabuhi uban sa Dios sa paghimo niya ni Cristo nga tabernaculo, Sacerdote, ug mga halad aron makasulod siya sa Dios ug makapahimulos sa tanang pagkamao sa Dios uban ni Cristo ug diha ni Cristo (Exo. 25—Lev. 27).
 - F. Segun sa dili permanenteng pagpuyo ni Job (Job 1:3) ug sa paghalad niyang halad nga sinunog alang sa iyang mga anak (v. 5), morag nabuhi si Job ug ang iyang mga higala sa panahon ni Abraham (Gen. 22:13); niadtong panahona wala pa isulat ang Pentateuch ni Moises ug ang kasugoan:
 1. Seguro gyong nakadawat si Job ug ang iyang mga higala og pipila ka pinadayag nga gipamulong sa ilang katigulangan; apan, ang nadawat nila sa ilang katigulangan kalab-anang kutob ra sa pinadayag sa panahon ni Abraham.

2. Busa, sa mga lantugi nila kalabot sa relasyon sa Dios sa tawo, walay timailhang nagpakita nga nakadawat silag diosnong pinadayag nga labaw pa sa paghukom sa Dios ug sa pagtagad Niya sa tawo diha sa iyang halad nga sinunog.
3. Wala gyoy gipamulong si Job ug ang iyang mga higala nga nagpasabot ni Cristo ug sa Espiritu sa Dios; naa sila sa unang ang-ang sa diosnong pinadayag.
4. Sa pagpakita sa Dios ni Job, morag niingon Siya nga, “Job, sa pagkatinuod wala gyod ka makaila kon kinsa Ko; wala ka makaamgo nga wala Koy kinutoban; dili sab nimo mahanduraw unsay gusto Nakong ihatag kanimo; Job, tuyo Nako nga ihatag ang Akong Kaugalingon kanimo, nga mahimo Kong pagpahimulos nimo aron mahimo kang bahin Nako; wala Ko matagbaw nga naa kay kaugalingong kaligdong, pagkahingpit, ug katul-id; gusto Ko nga mabatonan Ko nimo; tuyo Nako nga ipaambit ang Akong Kaugalingon kanimo ug wala nay laing ihatag kanimo kondili ang Akong Kaugalingon ra.”
5. Busa, dili na kinahanglan nga tukoron pa sa pinili ug tinubos nga katawhan sa Dios ang ilang kaugalingon diha sa tawhanong maayong kagawian, sama sa pagkahingpit, katul-id, ug kaligdong, ingon sa gibuhat ni Job, kondili magtinguha gyod sila sa Dios ingon sa lagsaw nga nangandoy ug magpahimulos sa Dios uban sa Iyang katawhan sa mga kombira Niya (Sal. 42:1-5; 43:3-5) aron mahimong tanan nila ang Dios nga mopuli sa tanang nakab-ot ug nabatonan nila; kini gyod ang tubag ngadto sa tulo ka higala ni Job ug bisan ngani ni Elihu ug ni Job (Job 10:13; itandi sa Efe. 3:9).
6. Sa kataposan sa basahon sa Job, niabot ang Dios, nga nagpakita nga ang nakulang ni Job sa iyang tawhanong kinabuhi mao ang Dios mismo; tungod niini, wala gyoy nakompletong kataposan ang basahon sa Job, nga mao gyod unta ang Dios nga hingpit nga mabatonan ni Job diha ni Cristo aron mausa siya sa Dios ug makapahimulos sa Dios nga pahat niya diha ni Cristo; sa Bag-ong Tugon ra hingpit nga makita kanang pinadayaga—40:10-14; 42:1-6; 10:13; itandi sa Efe. 3:9.

II. Naa sa Bag-ong Tugon ang lihok sa Dios sulod sa tawo aron matagbo ang panginahanglan sa tawo atubangan sa Dios; nagsugod ang lihok sa Dios sulod sa tawo sa unang pag-anhi ni Cristo ngadto sa pagpadayag sa Bag-ong Jerusalem sa bag-ong langit ug bag-ong yuta; wala pa gyod sukad mahitabo diha sa kasaysayan sa tawo kining lihoka—Juan 1:1, 14; Efe. 3:16-19; Bug. 21:2, 9-10:

- A. Isip tawong gipili ug gitawag sa Dios, motuo gyod ang tawo ngadto ni Jesucristo, nga mao ang Dios nga nagpakatawo, nagkinabuhi sa tawhanong kinabuhi, namatay, nabanhaw, ug nikayab alang nila ug uban nila, ug nahimong Espiritung taghatag-og-kinabuhi nga pneumaticong Cristo alang nila, aron mahimo Siyang ilang kaluwasan, kinabuhi, ug tanan (nga gipadayag sa Mateo hangtod sa Roma):
 1. Nianhi ang Dios aron ipanamkon sa tawhanong dalagang ulay ug ipanganak niya aron mahimong tawo, sa ingon niana gidala ang Dios nganha sa tawo ug nagsagol sa Dios ug tawo ingog usa ka butang apan dili ingog ikatulong pagkamao—Lev. 2:4-5; Juan 1:1, 14; Mat. 1:20, 23; 1 Tim. 3:16.
 2. Nagkinabuhi si Jesus nga nagbuhat sa tanan diha sa Dios, uban sa Dios, ug alang sa Dios; naa sa Iyang pagkinabuhi ang Dios, ug nausa Siya sa Dios; sa pagkinabuhi Niya isip tawo gipakita Niya kanato ang Iyang kinabuhi

nga nag-antos ingon nga panig-ingnan aron makopya nato kini sa pagsubay ug pagsunod nato sa Iyang ginawian; wala kini magpasabot og pag-awat lang Kaniya ug sa Iyang kinabuhi kondili sa paghulad Kaniya tungod sa pagpahimulos nato Kaniya ingon nga grasya diha sa atong mga pag-antos, aron Siya mismo nga Espiritung nagpuyo-sa-sulod, lakip sa tanang kadato sa Iyang kinabuhi, makahulad sa Iyang Kaugalingon sa sulod nato—Efe. 4:20-21; 1 Ped. 2:21.

3. Si Jesucristo, nga mao ang Tulo-usang Dios nga nagpakatawo ug ang pagkalawas sa Tulo-usang Dios (Col. 2:9), namatay diha sa Iyang pagka-tawo og mapulihon ug malangkobon-sa-tanan nga kamatayon aron taposon ang tanang negatibong butang ug ipagula ang diosnong kinabuhi gikan sa sulod Niya alang nato (Luc. 12:49-51; Juan 12:24).
 4. Gidaog Niya ang kamatayon, nisulod sa nagpalugwa-sa-tanan nga pagkabanhaw, gipanganak aron mahimong panganayng Anak sa Dios (nagdala sa tawo ngadto sa Dios), ug nahimong Espiritung taghatag-og-kinabuhi aron mapalugwa ug maumol ang Lawas ni Cristo—Buh. 2:23-24, 32; 13:33; Rom. 1:3-4; 8:28-29; Juan 20:22; 1 Cor. 15:45; 12:13.
 5. Gihuman Niya ang nilabaw-sa-tanan nga pagkayab ngadto sa mga langit ug gihimong Ginoo, Cristo, Lider, ug Manluluwas (Buh. 2:36; 5:31) aron mosanay Siya ug matukod ang iglesia nga Iyang gingharian (1:8; 26:16-18).
 6. Sa Iyang kamatayon, pagkabanhaw, ug pagkayab gipausa Niya Kaniya ang tanang magtutuo Niya; tungod niana, nailaha tanan ang Iyang kamatayon, pagkabanhaw, ug pagkayab, ug nahimong kasaysayan nila ang kasinatian Niya—Rom. 6:5-6; Efe. 2:5-6; *Mga Alawiton*, #949, estansa 4.
- B. Isip magtutuo ni Cristo, kinahanglan motubo ang tawo diha sa diosnong kinabuhi ni Cristo aron matransporma siya ngadto sa pagkamao ni Cristo pinaagi sa Espiritung nagpaambit-og-kinabuhi, aron matukod siya uban sa mga balaan ug mahimong Lawas ni Cristo, ang organismong magpadayag sa Tulo-usang Dios diha ni Cristo, ug mahimong bag-ong tawo nga bag-ong kabuhatan sa Dios nga motuman sa walay kataposang pamatigayon sa Dios sa pagkahingpit sa Bag-ong Jerusalem nga panagsagol sa nahikay nga Tulo-usang Dios ug sa gihi-mayang tawo nga may tulo ka bahin, aron mahimong hiniusang pagpadayag sa Dios-tawo sa eternidad (nga gipadayag sa 1 Corinto hangtod sa Bugna):
1. Gitubos ta sa Dios diha ni Cristo, gipasaylo ang atong mga sala, gihugasan, gimatarong, ug gipasig-uli ta Kaniya; gibutang ta sa Dios ngadto ni Cristo ug gihimo Siyang pagkamatarong, pagkabalaan, ug katubsanan nato—Efe 1:7; 1 Cor. 6:11; Rom. 3:22; 5:10; 1 Cor. 1:30.
 2. Gipanganak ta pag-usab sa Dios pinaagi sa pagkabanhaw ni Cristo (1 Ped. 1:3), ug gibag-o, gitransporma, ug gipasama ta Niya karon sa Iyang dagway sa himaya (Tito 3:5; Rom. 12:2; Efe. 4:23; 2 Cor. 4:16; 3:18; Rom. 8:28-30; Fil. 3:21).
 3. Sa Iyang pagbag-o ug pagtransporma, giut-ot ta Niya, gibutang ta sa Iyang kamatayon aron makaambit sa Iyang mga pag-antos, nga nagbuhat alang nato og walay kataposang gibug-aton sa himaya, aron masinati nato Siya diha sa Iyang pagkabanhaw ug mabatonan Siya diha sa dili matugkad nga kadato Niya—2 Cor. 4:16-18, 10; Fil. 3:10, 8; Efe. 3:8.
 4. Gipakalawas ang Dios Amahan diha sa Dios Anak (Col. 2:9), naamgohan ang Dios Anak ingon nga Dios Espiritu, ug nianhi ang Dios Espiritu aron mopuyo sa atong sulod ug mahimong realidad sa Tulo-usang Dios (Juan 14:16-20); ang Amahan, ang Ginoo, ug ang Espiritu nga mao ang Tulo-usang Dios na-

himo nang tinubdan, elemento, ug pagkamao sa iglesia nga Lawas ni Cristo (Efe. 4:4-6).

5. Kalabot sa misteryo sa Tulo-usang Dios nga maoy realidad sa mga magtutuo, daghan pag isulti si Cristo sa Iyang mga tinun-an, apan dili pa sila makadawat niini sa dili pa moabot ang Espiritu sa realidad aron mopadayag ning mga butanga kanila (Juan 16:12-15); gibuhat kini sa Espiritu sa realidad labi na gyod pinaagi ni apostol Pablo, nga maoy nikompleto sa pulong sa Dios, sa ato pa, sa diosnong pinadayag (Col. 1:25-27) kalabot ni Cristo nga misteryo sa Dios (2:2) ug sa iglesia nga misteryo ni Cristo (Efe. 3:4).
6. Si Cristo, nga diosnong pahat nga giapod-apod sa Dios sa mga balaan ug ang kinabuhi sulod sa mga magtutuo, nahimo nang tanang bahin sa bag-ong tawo ug naa sa tanang bahin sa bag-ong tawo, nga mao ang Iyang organicong Lawas; gusto sa Dios nga himoon si Cristo, ang pagkalawas Niya, nga tanan kanato, nga mga magtutuo ni Cristo—Col. 1:12, 15-19; 3:4, 10-11; 1 Cor. 12:12-13.
7. Isip Espiritung taghatag-og-kinabuhi, nagpuyo Siya sa sulod nato aron ipatinuod Niya kanato ang Iyang Kaugalingon ug ang tanang nahuman, nabatonan, ug nakab-ot Niya aron mausa ta Niya ug matransporma ngadto sa mao rang dagway sa Ginoo gikan sa himaya ngadto sa himaya; sa pagliso nato sa atong kasingkasing sa Ginoo, masud-ong nato ang himaya sa Ginoo aron makita nato mismo ang Ginoo ug magpasumbalik ta sa Iyang himaya aron makita Siya sa uban pinaagi nato —2 Cor. 3:16-18.
8. Tumanon sa Dios diha ni Cristo ang buhat Niya sa pagtransporma sa sulod nato hangtod mahingpit sa Bag-ong Jerusalem ang Iyang pagtransporma, una sa mga mananaog sa gingharian sa millennium (Bug. 2:7) ug sa kataposan, sa tanang balaan sa bag-ong langit ug bag-ong yuta, himoon ang tanang pinili ug tinubos nga katawhan Niya nga hiniusang pagpadayag Niya, nga magpadayag Niya, dili sa bisan unsang tawhanong maayong kagawian lang (ingon sa gibuhat ni Job), sa kinahingpitan gyod sa eternidad (21:1—22:5).